

Broj: 03-02-596/2021
Sarajevo, 20.05.2021. godine

Bosna i Hercegovina
Federacija Bosne i Hercegovine
PARLAMENT FEDERACIJE
SARAJEVO

Prijelazno: 20-05-2021			
Org. jed.	Broj	Priloge	Vrijednost
01, 02 - 02	-	-	1147,20

**PARLAMENT FEDERACIJE
BOSNE I HERCEGOVINE**

- Predstavnički dom -
gosp. Mirsad Zaimović, predsjedavajući ✓
- Dom naroda -
gosp. Tomislav Martinović, predsjedavajući

Poštovani,

U skladu sa članom IV.B.3.7.c) (III) Ustava Federacije Bosne i Hercegovine, a u vezi sa članom 172. stav (1) Poslovnika Predstavničkog doma Parlamenta Federacije BiH („Službene novine Federacije BiH“, br. 69/07, 2/08 i 26/20) i članom 164. stav (1) Poslovnika o radu Doma naroda Parlamenta Federacije BiH („Službene novine Federacije BiH“, br. 27/03, 21/09 i 24/20), **radi razmatranja i usvajanja po skraćenom postupku, dostavljam Vam PRIJEDLOG ZAKONA O IZMJENAMA ZAKONA O POLJOPRIVREDI**, koji je utvrdila Vlada Federacije Bosne i Hercegovine na 266. sjednici, održanoj 20.05.2021. godine.

Prijedlog zakona se dostavlja na službenim jezicima i pismima Federacije Bosne i Hercegovine u printanoj i elektronskoj formi (CD).

Istovremeno molim da se isti uvrsti u Prijedlog dnevnog reda 22. redovne sjednice Predstavničkog doma Parlamenta Federacije BiH, čije održavanje je zakazano 26. maja 2021. godine i u Prijedlog dnevnog reda 11. sjednice Doma naroda Parlamenta Federacije BiH, čije održavanje je zakazano 27. maja 2021. godine.

S poštovanjem,



- Prilog: - Prijedlog zakona na bosanskom jeziku,
- Odredbe Zakona koje se mijenjaju,
- Izjava o usklađenosti,
- Obrazac broj 2 i
- Zakon o poljoprivredi („Službene novine Federacije BiH“, br. 88/07, 4/10, 27/12 i 7/13) (CD).

**Cc: Federalno ministarstvo poljoprivrede, vodoprivrede i šumarstva
gosp. Šemsudin Dedić, ministar**

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

ZAKON O IZMJENAMA ZAKONA O POLJOPRIVREDI

Sarajevo, maj 2021. godine

PRIJEDLOG ZA DONOŠENJE ZAKONA PO SKRAĆENOM POSTUPKU

Odredbama člana 172. stav (1) Poslovnika Predstavničkog doma Parlamenta Federacije Bosne i Hercegovine („Službene novine Federacije BiH“, br. 69/07, 2/08 i 26/20), propisuje se da kada nije u pitanju složen i obiman zakon, podnosilac prijedloga zakona može umjesto nacrtu podnijeti prijedlog zakona i predložiti da se o prijedlogu zakona raspravlja po skraćenom postupku bez nacrtu zakona.

Također, u članu 164. stav (1) Poslovnika o radu Doma naroda Parlamenta Federacije Bosne i Hercegovine („Službene novine Federacije BiH“, br. 27/03, 21/09 i 24/20) propisuje se kada je to Programom rada Doma naroda predviđeno ili kada nije u pitanju složen i obiman zakon, podnosilac prijedloga zakona može umjesto nacrtu podnijeti prijedlog zakona i predložiti da se o prijedlogu zakona raspravlja po skraćenom postupku bez nacrtu zakona.

OBRAZLOŽENJE

Sadržaj izmjena predloženog Zakona, odnosi se na izmjene u manjem obimu jer se u odnosu na osnovni tekst Zakona ne unose značajnije izmjene odnosno ne mijenja suština zakona već se vrši usaglašavanje sa Zakonom o razvojnom planiranju i upravljanju razvojem u Federaciji Bosne i Hercegovine i Zakonom o inspekcijama Federacije BiH i reguliše situacija koja nije predviđena važećim Zakonom, vezano za postupanje sa podnesenim zahtjevima za novčane podrške dok se ne okonča pokrenuti upravni spor.

Radi navedenog, predlažemo da se Zakon o izmjenama Zakona o poljoprivredi donese po skraćenom postupku.

ZAKON O IZMJENAMA ZAKONA O POLJOPRIVREDI

Član 1.

U Zakonu o poljoprivredi („Službene novine Federacije BiH“, br. 88/07, 4/10, 27/12 i 7/13) član 5. mijenja se i glasi:

„Član 5.

Strategija poljoprivrede i ruralnog razvoja Federacije Bosne i Hercegovine

- (1) Poljoprivredna politika provodi se prema Strategiji poljoprivrede i ruralnog razvoja Federacije Bosne i Hercegovine (u daljem tekstu: poljoprivredna strategija) kojom se utvrđuju ciljevi i prioriteti razvoja sektora, način njihovog ostvarivanja, finansijski i institucionalni okvir za implementaciju, monitoring, evaluaciju i izvještavanje.
- (2) Federalno ministarstvo poljoprivrede, vodoprivrede i šumarstva (u daljem tekstu: Federalno ministarstvo poljoprivrede) koordinira i vodi proces izrade poljoprivredne strategije uvažavajući principe izrade strateških dokumenata u Federaciji koji su propisani Zakonom o razvojnom planiranju i upravljanju razvojem u Federaciji Bosne i Hercegovine („Službene novine Federacije BiH“ broj 32/17) i Uredbom o izradi strateških dokumenata u Federaciji Bosne i Hercegovine („Službene novine Federacije BiH“ br. 74/19 i 2/21).
- (3) Federalni ministar poljoprivrede, vodoprivrede i šumarstva (u daljem tekstu: federalni ministar poljoprivrede) imenuje ekspertnu komisiju za praćenje i usmjeravanje izrade poljoprivredne strategije koja će primjenom otvorenog metoda koordinacije, osigurati proces konsultacija i usaglašavanja sa nadležnim institucijama na nivou Bosne i Hercegovine, Federacije i kantona u procesu donošenja poljoprivredne strategije.
- (4) Poljoprivrednu strategiju donosi Parlament Federacije Bosne i Hercegovine (u daljem tekstu: Parlament Federacije) na prijedlog Vlade Federacije Bosne i Hercegovine (u daljem tekstu: Vlada Federacije) za period od najviše sedam godina.“

Član 2.

U članu 25. stav (1), članu 29. stav (1) i članu 33. stav (3) riječi: „Zakon o novčanoj podršci u primarnoj poljoprivrednoj proizvodnji („Službene novine Federacije BiH“ broj 28/04), zamjenjuju se riječima u odgovarajućem padežu: „Zakon o novčanim podrškama u poljoprivredi i ruralnom razvoju („Službene novine Federacije BiH“, br. 42/10 i 99/19) (u daljem tekstu: Zakon o novčanim podrškama).

Član 3.

U članu 27. u stavu (3) broj: „1/98“ zamjenjuje se brojem: „52/09“.

Član 4.

U članu 54. u stavu (2) broj: "69/05" zamjenjuje se brojem: „73/14“.

Član 5.

Član 57. briše se.

Član 6.

U članu 58. u stavu (3) iza riječi „mjerama“, rječica „ne“ briše se.

Član 7.

Član 59. briše se.

Član 8.

Ovaj Zakon stupa na snagu osmog dana od dana objave u „Službenim novinama Federacije BiH“.

O B R A Z L O Ž E N J E

PRIJEDLOGA ZAKONA O IZMJENAMA ZAKONA O POLJOPRIVREDI

I USTAVNI OSNOV

Ustavni osnov za donošenje ovog Zakona sadržan je u odredbi tačke c.) Amandmana VIII na Ustav Federacije Bosne i Hercegovine, prema kojoj je u isključivoj nadležnosti Federacije utvrđivanje ekonomske politike, uključujući planiranje i obnovu, te politiku korištenja zemljišta na federalnom nivou.

II RAZLOZI ZA DONOŠENJE

Zakon o poljoprivredi je objavljen u „Službenim novinama Federacije BiH“ broj 88/07 i stupio na snagu 11.12.2007. godine. Zakon o poljoprivredi je krovni poljoprivredni zakon (*Lex generalis*), kojim se funkcionalno određuje šta je potrebno u poljoprivredi u Federaciji BiH te formalno-pravno objedinjuju i definišu osnovni sadržaji u području poljoprivrede, koji su nužno potrebni za provođenje ciljeva i mjera poljoprivredne politike. Do sada su izvršene izmjene i dopune manjeg obima ovog zakona u tri navrata.

Planom rada Ministarstva i Vlade Federacije BiH je predviđeno da se pristupi izradi novog Zakona o poljoprivredi i novog Zakona o novčanim podrškama. Imajući u vidu da se radi o zakonima čija je priprema izuzetno složena radi usklađivanja sa regulativom EU za koje je u skladu sa važećim propisima neophodno uraditi i sveobuhvatnu procjenu uticaja, te provesti složeni postupak konsultacija i javnih rasprava jer će promjene koje je potrebno napraviti, uticati na veći broj populacije (sve poljoprivredne proizvođače), nismo još završili postupak pripreme novog zakona. Radi toga je zaključeno da se što hitnije izvrše izmjene ovog zakona u određenim segmentima, kako bi se osiguralo usaglašavanje sa Zakonom o razvojnom planiranju i upravljanju razvojem u Federaciji Bosne i Hercegovine („Službene novine Federacije BiH“, broj 32/17) i Uredbom o izradi strateških dokumenata u Federaciji Bosne i Hercegovine („Službene novine Federacije BiH“, br. 74/19 i 2/21) vezano za izradu poljoprivredne strategije. Istovremeno smo izvršili i izmjene poziva na propise koji su u međuvremenu izmijenjeni (promjene naziva zakona odnosno broja Službenih novina Federacije BiH u kojima su isti objavljeni). Izvršeno je i usaglašavanje sa novim Zakonom o inspekcijama Federacije BiH („Službene novine Federacije BiH“, broj 73/14).

U postupku izmjena ovog zakona, je sprovedena skraćena procjena uticaja propisa (RIA) jer se radi o izmjenama manjeg obima koje su vezane za usklađivanje sa odredbama Zakona o razvojnom planiranju i upravljanju razvojem u Federaciji Bosne i Hercegovine vezano za segment donošenja sektorske strategije kao i usklađivanje sa Zakonom o inspekcijama te druge manje izmjene koje ne utiču na sam sadržaj predloženih zakonskih rješenja u važećem zakonu u suštini, već su izmjene formalno-pravne prirode.

Imajući u vidu da se radi o izmjenama manjeg obima, predložen je skraćeni postupak za donošenje predmetnog Zakona.

III OBRAZLOŽENJE POJEDINIH PRAVNIH RJEŠENJA

Član 1. Ovom izmjenom se u potpunosti mijenja postojeći član 5. Zakona u cilju usaglašavanja sa Zakonom o razvojnom planiranju i upravljanju razvojem u Federaciji Bosne i Hercegovine („Službene novine Federacije BiH“, broj 32/17) i Uredbom o izradi strateških dokumenata u Federaciji Bosne i Hercegovine („Službene novine Federacije BiH“, br. 74/19 i 2/21).

U naslovu člana kao i u stavu (1) postojećeg Zakona promijenjen je naziv strategije u cilju usklađivanja i dodavanja važne komponente EU zajedničke poljoprivredne politike ruralnog razvoja tako da se umjesto dosadašnjeg naziva „Srednjoročna strategija razvoja poljoprivrednog sektora u Federaciji BiH“ koristi naziv „Strategija poljoprivrede i ruralnog razvoja Federacije Bosne i Hercegovine“. Pored toga u ovom stavu je definisan sadržaj strategije u skladu sa članom 17. Zakona o razvojnom planiranju.

U stavu (2) je propisano da Federalno ministarstvo poljoprivrede, vodoprivrede i šumarstva koordinira i vodi proces izrade poljoprivredne strategije uvažavajući principe izrade strateških dokumenata u Federaciji koji su propisani Zakonom o razvojnom planiranju i upravljanju razvojem u Federaciji Bosne i Hercegovine i Uredbom o izradi strateških dokumenata u Federaciji Bosne i Hercegovine te uvedena skraćunica koja je i ranije bila situirana u članu 5. zakona.

Stavom (3) je propisano da Federalni ministar poljoprivrede, vodoprivrede i šumarstva imenuje ekspertnu komisiju za praćenje i usmjeravanje izrade poljoprivredne strategije koja će primjenom otvorenog metoda koordinacije, osigurati proces konsultacija i usaglašavanja sa nadležnim institucijama na nivou Bosne i Hercegovine, Federacije i kantona u procesu donošenja poljoprivredne strategije. Ovo je vrlo važno pitanje jer osigurava formalno pravni okvir za provođenje principa otvorenog metoda koordinacije (OMK). Ovo je u skladu i sa članom 7. stav (2) tačka a) i članom 17. stav (3) Zakona o razvojnom planiranju kojim su federalni organi uprave, u okviru poslova razvojnog planiranja i upravljanja razvojem između ostaloga dužni osigurati „koordinaciju izrade sektorskih strategija u Federaciji“ te u proces izrade sektorske strategije uključiti nadležne institucije na nivou Bosne i Hercegovine, Federacije i kantona, primjenom principa otvorenog metoda koordinacije. Komisija treba, putem konsultacija i usaglašavanja svih uključenih nivoa vlasti, osigurati definiranje i provođenje zajedničkih ciljeva u Federaciji, izbor zajedničkih indikatora za praćenje realizacije ciljeva i pripremu izvještaja, kako unutar zemlje tako i u procesu EU integracija.

Stavom (4) je propisano da poljoprivrednu strategiju donosi Parlament Federacije Bosne i Hercegovine na prijedlog Vlade Federacije Bosne i Hercegovine za period od najviše sedam godina umjesto pet godina kako je to ranije bilo određeno, čime se vrši usklađivanje sa članom 15. stav (3) Zakona o razvojnom planiranju kojim je propisano da se strateški dokumenti donose na vremenski period usklađen sa ciklusom planiranja Evropske unije odnosno na vremenski period važenja Strategije razvoja Federacije BiH. (period od sedam godina).

Član 2. U važećem zakonu se navodi raniji naziv Zakona o novčanim podrškama kao i broj službenih novina kada je objavljen. U međuvremenu je donesen novi Zakon o novčanim podrškama sa izmijenjenim nazivom i brojem službenih novina te je izvršena izmjena čl. 25. stav (1), čl. 29. stav (1) i čl. 33. stav (3) na način da je predloženo da se

riječi: „Zakon o novčanoj podršci u primarnoj poljoprivrednoj proizvodnji („Službene novine Federacije BiH“, broj 28/04), zamjene sa riječima u odgovarajućem padežu: „Zakon o novčanim podrškama u poljoprivredi i ruralnom razvoju („Službene novine Federacije BiH“, br. 42/10 i 99/19).

Član 3. Izmjena broja Službenih novina Federacije BiH je izvršena u članu 27. stav (3) vezano za Zakon o poljoprivrednom zemljištu jer je u međuvremenu donesen novi Zakon, a nije izvršena izmjena poziva na Službene novine Federacije BiH u važećem Zakonu o poljoprivredi.

Član 4. Izvršena je izmjena u članu 54. stav (2) Zakona na način da je promjenjen broj Službenih novina Federacije BiH vezano za Zakon o inspekcijama. (broj: „69/05“ zamjenjuje se brojem: „73/14“) jer je u međuvremenu donesen novi Zakon o inspekcijama, a nije izvršena izmjena u Zakonu o poljoprivredi.

Član 5. Izvršeno brisanje člana 57. važećeg Zakona jer se isti odnosio na donošenje planova rada inspekcije kao i izradu mjesečnih i godišnjih izvještaja federalnih i kantonalnih inspektora, a predmetno je detaljno regulisano Zakonom o inspekcijama i nema potrebe za ponavljanjem istog iz razloga što je to detaljno propisano u materijalnom propisu – Zakonu o inspekcijama FBiH.

Član 6. Predviđena izmjena člana 58. stav (3) važećeg Zakona na način da se propiše da žalba koja se ulaže na rješenje federalnog poljoprivrednog inspektora o upravnim mjerama, odgađa izvršenje tog rješenja. Naime praksa nam je pokazala da je u periodu dok se ne završi drugostepeni postupak, (postupanje po žalbama na rješenja federalnog poljoprivrednog inspektora), veoma značajno, efikasno i cjelishodno da se odgodi izvršenje rješenja federalnog poljoprivrednog inspektora jer imamo određeni broj situacija kada je žalba bila osnovana i poništeno prvostepeno rješenje inspektora, a tokom trajanja drugostepenog postupka se moglo pristupiti izvršenju prvostepenog rješenja. Radi toga je predložena izmjena ovog člana, a kojom će se pored gore navedenog, osigurati i usklađivnje sa novim Zakonom o inspekcijama.

Član 7. Predviđa u potpunosti brisanje član 59. jer se ovaj član odnosi na postupanje federalne poljoprivredne inspekcije po žalbama kantonalne poljoprivredne inspekcije. Predmetno je detaljno regulisano Zakonom o inspekcijama i nema potrebe za ponavljanjem u Zakonu o poljoprivredi. Predmetno je ugrađeno u federalni Zakon o poljoprivredi iz razloga što je u periodu kada je taj Zakon pripreman (2006. godine) i donesen (2017. godine) oblast inspeksijskog nadzora bila drugačije regulisana te je krovnim zakonom razrađivano i predmetno. Dakle, prestala je potreba za definisanjem navedenog jer od 2014. godine imamo novi Zakon o inspekcijama Federacije BiH.

Član 8. Definiše stupanje na snagu zakona osmog dana od dana objave u „Službenim novinama Federacije BiH“.

IV-FINANSIJSKA SREDSTVA

Za donošenje ovog Zakona nije potrebno izdvajanje dodatnih sredstava iz Budžeta Federacije BiH.

ODREDBE ZAKONA O POLJOPRIVREDI
("Službene novine Federacije BiH", br. 88/07, 4/10, 27/12 i 7/13)
KOJE SE MIJENJAJU

Član 5.

Srednjoročna strategija razvoja poljoprivrednog sektora

Poljoprivredna politika provodi se prema Srednjoročnoj strategiji razvoja poljoprivrednog sektora u Federaciji (u daljnjem tekstu: poljoprivredna strategija) koja sadrži kratkoročne i srednjoročne ciljeve, mjere, vremenski slijed, nosioce i rokove ostvarenja tih ciljeva u sektoru poljoprivrede i donosi se za period od pet godina.

Federalno ministarstvo poljoprivrede, vodoprivrede i šumarstva (u daljnjem tekstu: Federalno ministarstvo poljoprivrede) u saradnji sa kantonalnim ministarstvima nadležnim za poslove poljoprivrede utvrđuje i priprema osnovne elemente za izradu poljoprivredne strategije.

Federalni ministar poljoprivrede, vodoprivrede i šumarstva (u daljnjem tekstu: federalni ministar poljoprivrede) imenuje ekspertnu komisiju za izradu poljoprivredne strategije nakon čega se poljoprivredna strategija stavlja u javnu stručnu raspravu i dostavlja na razmatranje i utvrđivanje prijedloga Vladi Federacije Bosne i Hercegovine (u daljnjem tekstu: Vlada Federacije).

Poljoprivrednu strategiju usvaja Parlament Federacije Bosne i Hercegovine (u daljnjem tekstu: Parlament Federacije) za period od najviše pet godina.

Federalno ministarstvo poljoprivrede donosi godišnji operativni program implementacije poljoprivredne strategije najkasnije do 31.03. tekuće godine.

Član 25.

Mjere strukturne politike provode se prema Zakonu o novčanoj podršci u primarnoj poljoprivrednoj proizvodnji ("Službene novine Federacije BiH", broj 28/04), te drugim programima Vlade Federacije.

Član 27.

Mjere zemljišne politike čini skup mjera kojima se utiče na pravilno i racionalno gospodarenje poljoprivrednim zemljištem kao dobrom od interesa za Federaciju u skladu sa važećim propisima i uz sistemsku zaštitu okoliša.

Mjere zemljišne politike su:

1. dodjela prava korištenja (koncesija i zakup) i prodaja poljoprivrednog zemljišta u vlasništvu države poljoprivrednim gazdinstvima radi obavljanja poljoprivredne djelatnosti,
2. unapređenje gospodarenja poljoprivrednim zemljištem što podrazumijeva grupisanje zemljišta poljoprivrednih gazdinstava u veće i pravilnije čestice i izgradnju prateće

infrastrukture (saobraćajnice, hidrotehnički, hidromelioracijski i agromelioracijski zahvati oko ureñenja zemljišta),

3. zaštita poljoprivrednog zemljišta od neracionalnog korištenja, infekcije, kontaminacije, degradacije i destrukcije,

4. zaštita zemljišta od erozije,

5. utvrñivanje namjene i pogodnosti korištenja poljoprivrednih zemljišta (jako strme oranice pretvoriti u pašnjake ili pošumiti), odnosno promijena načina korištenja ovih zemljišta,

6. uspostavljanje sistema kontrole plodnosti tla,

7. donošenje programa ureñenja poljoprivrednog zemljišta (odvodnjavanje, navodnjavanje, komasacije i dr.),

8. uvoñenje zemljišnog monitoringa, odnosno praćenje stanja i promjena na zemljištu i u zemljištu,

9. ostale mjere.

Ove mjere detaljnije se razrañuju Zakonom o poljoprivrednom zemljištu ("Službene novine Federacije BiH", broj 1/98).

Program aktivnosti potreban za unapreñenje gospodarenja poljoprivrednim zemljištem iz stava 2. tač. 2., 7. i 8. ovog člana na prijedlog federalnog ministra poljoprivrede, federalnog ministra pravde, federalnog ministra prostornog ureñenja, direktora Federalnog zavoda za agropedologiju i direktora Federalne geodetske uprave donosi Vlada Federacije.

Član 29.

Korisnici novčanih sredstava i drugih oblika podrške u poljoprivredi, odnosno klijenti (u daljnjem tekstu: korisnici - klijenti) mogu biti pravna lica sa sjedištem u Federaciji i fizička lica koja imaju prebivalište u Federaciji, a koja su registrirana za poljoprivrednu proizvodnju i upisana kao poljoprivredni proizvođači u Registar poljoprivrednih gazdinstava i Registar klijenata, pod uvjetom da proizvode za tržište ili pružaju usluge na tržištu te ispunjavaju i druge uvjete koje propisuje federalni ministar poljoprivrede posebnim propisima, a u skladu sa Zakonom o novčanoj podršci u primarnoj poljoprivrednoj proizvodnji.

Korisnici - klijenti ostvaruju novčana sredstva na osnovu podnesenog zahtjeva i dužni su ih namjenski upotrebljavati.

Namjenska upotreba novčanih sredstava detaljnije se razrañuje u zakonima o novčanoj podršci Federaciji i kantonima.

Korisnik-klijent dužan je vratiti novčana sredstva dobivena na osnovu netačnih podataka i/ili ako dobivena sredstva nenamjenski utroši zajedno sa zateznim kamatama u visini koja je zakonom propisana u roku od 30 dana od dana donošenja rješenja kojim je utvrđeno postojanje netačnih podataka ili nenamjensko trošenje dobivenih novčanih sredstava.

U slučaju iz stava 4. ovog člana, korisnik-klijent može podnijeti novi zahtjev za sticanje prava iz stava 1. ovog člana po isteku tri godine računajući od dana povrata novčanih sredstava uključujući zakonske zatezne kamate u cjelini, a na osnovu rješenja kojim je federalni ministar poljoprivrede ili poljoprivredni inspektor naredio korisniku-klijentu prava povrat sredstava.

Korisnici-klijenti moraju čuvati dokumentaciju na osnovu koje su ostvarili novčana sredstva najmanje tri godine računajući od dana dobivanja sredstava.

Svi korisnici-klijenti koji podnose zahtjeve za novčane podrške moraju biti upisani u registre iz čl. 46. i 49. ovog zakona.

Sve podatke upisane u Registar klijenata u Federaciji Federalno ministarstvo poljoprivrede dužno je dostaviti nadležnom organu na nivou Bosne i Hercegovine s ciljem upisa u Centralni registar klijenata.

Izuzetno od stava 1. ovog člana Vlada Federacije Bosne i Hercegovine će donijeti poseban program na osnovu kojeg će dodjeljivati sredstva korisnicima na ostalom prostoru Bosne i Hercegovine.

Član 33.

Poljoprivredniku definiranom u članu 3. ovog Zakona poljoprivredna djelatnost može biti jedino - glavno ili dopunsko zanimanje.

Poljoprivrednik koji proizvodi za tržište ili pruža usluge na tržištu ima pravo na novčane podrške.

U cilju ostvarenja svojih prava na novčane podrške koje su određene Zakonom o novčanoj podršci u primarnoj poljoprivrednoj proizvodnji kao i ostvarenja prava u skladu sa odredbama ovog Zakona, poljoprivrednik treba biti upisan u Registar poljoprivrednih gazdinstava i upisan u Registar klijenata te ispuniti i druge uvjete u skladu sa odredbama ovog Zakona nakon čega mu se izdaje iskaznica nosioca poljoprivrednog gazdinstva, odnosno poljoprivrednika.

Izgled i sadržaj iskaznice nosioca poljoprivrednog gazdinstva, odnosno poljoprivrednika iz stava 3. ovog člana propisuje federalni ministar poljoprivrede posebnim propisom.

Član 54.

Inspekcijski nadzor

Inspekcijski nadzor u provođenju ovog Zakona i propisa donesenih na osnovu ovog Zakona vrše federalne poljoprivredne inspekcije organizirane u Federalnoj upravi za inspekcijske poslove i kantonalne poljoprivredne inspekcije organizirane u kantonalnim upravama za inspekcijske poslove.

Inspekcijski nadzor vrši se u skladu sa Zakonom o organizaciji organa uprave u Federaciji Bosne i Hercegovine ("Službene novine Federacije BiH", broj 35/05) i Zakonom o inspekcijama u Federaciji Bosne i Hercegovine ("Službene novine Federacije BiH", broj 69/05) - (u daljnjem tekstu: Zakon o inspekcijama).

Član 57.

Poljoprivredna inspekcija u skladu sa odredbama člana 27. Zakona o inspekcijama donosi godišnje programe rada i mjesečne planove rada vršenja inspekcijskih nadzora.

Pri izradi godišnjih programa i planova Federalna poljoprivredna inspekcija mora tražiti mišljenje Federalnog ministarstva poljoprivrede, a kantonalna poljoprivredna inspekcija mora tražiti mišljenje kantonalnih ministarstava nadležnih za poslove poljoprivrede.

Glavni federalni poljoprivredni inspektor mjesečno podnosi izvještaj o izvršenim inspekcijskim pregledima u oblasti poljoprivrede Federalnom ministarstvu poljoprivrede.

Glavni kantonalni poljoprivredni inspektori podnose mjesečne izvještaje kantonalnom ministarstvu nadležnom za poslove poljoprivrede vezano za izvršeni inspekcijski nadzor iz oblasti poljoprivrede.

Član 58.

Na rješenje federalnog poljoprivrednog inspektora o naloženim upravnim mjerama na osnovu ovog Zakona može se uložiti žalba u roku od osam dana od dana prijema rješenja.

O žalbi rješava Federalno ministarstvo poljoprivrede.

Žalba na rješenje federalnog poljoprivrednog inspektora o upravnim mjerama ne odgađa izvršenje tog rješenja.

Odredbe st. od 1. do 3. ovog člana odnose se i na zaključak federalnog inspektora protiv kojeg je dopuštena žalba.

Član 59.

Na rješenje kantonalnog poljoprivrednog inspektora o naloženim upravnim mjerama, na osnovu ovog Zakona, može se uložiti žalba u roku od osam dana od dana prijema rješenja.

O žalbi rješava direktor Federalne uprave za inspekcijske poslove.

Žalba na rješenje kantonalnog poljoprivrednog inspektora o upravnim mjerama ne odgađa izvršenje tog rješenja.

Odredbe st. od 1. do 3. ovog člana odnose se i na zaključak kantonalnog inspektora protiv kojeg je dopuštena žalba.